

四庫全書

集部

欽定四庫全書

集部

倪文僖集卷十九

詳校官庶吉士臣陳若霖

中書臣劉源溥覆勘

總校官檢討臣何思鈞

校對官編修臣汪鏞

謄錄監生臣李崇實

欽定四庫全書

倪文僖集卷九

明 倪謙 撰

律詩七言

夏日遊宣府李揮使北園席上步于景瞻韻二首

時天順庚辰六月也

野花園草競芬芳坐愛南薰透葛涼飲量任開千日醞  
醉魂猶到五雲鄉原思自信貧非病杜甫誰知老更狂

倒着接羅渾不省路人爭說自高陽

綺席風生酒氣芳清酣何必按伊涼得朋自喜皆同志  
為客寧愁在異鄉歸思空懷弘景逸行歌堪嘆接輿狂  
舉頭瞻望長安近一片丹心獨向陽

和韓都憲詩

有序

予昔奉命校文京闕精於去取一秉至公權臣有因子  
故不獲售其私者大為所恨遂妄生媒孽中以奇禍必  
致死地以快其忿時則有都憲韓公持正不阿力為脫

解始得減死謫戍邊城感刻無極嗚呼悲夫頃者公亦  
奉敕臨邊喜獲二天之庇權臣積惡貫盈殞于非命報  
亦烈矣惟公知予誣枉之詳荷蒙惠顧復以詩見慰殊  
增感愴謹步嚴韻二章豈敢言詩聊以泄不平之氣與  
夫懷德之衷云耳

身嬰縲械出君門遠謫窮邊淚暗吞觸禍只應當薄命  
含汙何以雪沈寃未言息壤宜投杼欲訴旻天惜戴盆  
感荷力全垂死際拊心恒愧莫酬恩

肯為權姦啟倖門禍機陰中只聲吞南冠獨受羈囚苦  
東海誰明孝婦冤直道不容還似柳小才見殺已如盆  
丈人何幸憐枯鮒吮沫時沾勺水恩

再和前韻答韓都憲

昔承詔獄下黃門五百嚴刑氣若吞虐焰相陵將致死  
皇威雖近敢稱冤女生不見門懸悅妾殞空憐坐鼓盆  
幸得投荒離虎口北行深荷九重恩

邊塞窮居草作門舉家脫粟強須吞千金劒利甘遭折

六月霜飛苦抱冤墮地何殊星化石洗天惟待雨傾盆  
安能釋繫歸田里沒齒衡茅頌聖恩

待漏曾陪紫禁門氣豪雲夢羨胸吞持平難解姦臣忿  
忍恥常懷逐客冤望眼空懸棲鳳閣澡身欲借洗頭盆  
喜逢伯樂能知己朝夕能忘國士恩

錦衣獄中有作追錄於此

不才自保一生無禍中陰謀恣矯誣貢院本期登俊造  
圜扉何意齒囚徒通宵不寐更三鼓終日相親火一爐

聖德好生疎禁網肯令冤濫及非辜

次韻于景瞻百樣嬌

即麗春花也

雕闌頻倚暗銷魂  
其奈風前百媚存  
春醉半醒霞暈薄  
曉粧初罷粉香溫  
凌波仙子嬌相倚  
解珮江妃笑欲言  
宜化彩雲歸閬苑  
紛紛凡卉敢同論

羣芳穠麗不沾埃  
六月纔從塞北開  
玉頰爭妍偏惹恨  
錦苞凝艷半含胎  
雨滋巫峽行雲倦  
風引昭陽侍宴回  
可是多情憐國色  
殷勤分種客窓栽



次韻于景瞻秋懷五首

有序

承示秋懷之作五章宦情羈思讀之凄然予岑鬱之  
衷寧獨異此韻亦未之發耳因步嚴韻聊以自泄詩成  
快吟數過不覺感傷淚下盈掬是則四時之景惟秋可  
悲豈非古今所同然者乎

暝雲寒雨暗亭皋范叔誰憐為解袍涉世逢屯宜自遣  
謀生多計亦徒勞小窓字畫臨羲獻孤館詩箋究鄭毛  
圖史相親如故友窺人況有月輪高

塞垣榆落早驚秋  
鴈影砧聲總是愁  
客裡詩情元亮酒  
天涯鄉思仲宣樓  
抵金書信憑誰寄  
畫虎功名付道謀  
身墮窮邊俄二載  
不知何日大刀頭

蕭瑟西風送晚涼  
千山搖落寄他鄉  
烽烟時警深邊戍  
烽火宵明古戰場  
蝶夢悠揚雲杳杳  
萍踪飄泊海茫茫  
久知身後名無用  
莫羨杜陵黃四娘

百雉孤城夕照明  
班超空動玉關情  
尖峯刺眼呈秋劍  
靈籟傷懷鼓夜笙  
陟險自憐鹽驢苦  
知機不及海鷗驚

中宵睡醒煩憂集卧聽朝雞戒曉聲

愁邊得句口能占茶蓼親嘗味轉甜風挾塵沙欺病目  
雷驅山雨撲窮檐秋來倍覺丹心壯老去頻看白髮添  
喜決天池無限水不令轍鮒一毫沾

和胡鍊繡衣昭君詞

昭陽常向夢中歸無羽何由得奮飛愁壓眉山慵對鏡  
病消肌玉不勝衣傷心白草呈秋色極目黃沙起夕霏  
真使妾身能制敵漢家良計孰云非

萬里空看漢使歸  
羞隨驕子効于飛  
穹廬馬湫初嘗酒  
寒磧貂裘為換衣  
憂思釀成雲黯黯  
啼痕散作雨霏霏  
琵琶苦調和羌管  
舉目堪憐事事非

旅鴈年年去復歸  
此身陷敵若為飛  
心情流水趨滄海  
世事浮雲變白衣  
出塞哀笳聲裊裊  
當筵角旋舞罪罪  
陽關北望傷神處  
蔓草寒沙道路非

遼鶴猶能故國歸  
越禽亦解向南飛  
坐看絕塞時殫鋏  
起視明河夜攬衣  
無語暗傷情脈脈  
長吁空結氣霏霏

君王早辯圖多偽何至紅顏委命非

鳥聲愁聽不如歸此地忻無杜宇飛  
玉漏寧聞催曉箭  
翠裘空念警宵衣銀釭蘭燼噓晴焰  
石鼎茶烟颺煖霏  
眼盼宮車勞望幸回思往事總成非

遼陽張教授升謫寓隆慶為社學師以詩見寄次

韻奉答

新篇詞藻發春榮遠慰羈懷見舊情  
道比曾參猶受謗  
迹同康伯且逃名一窓晚黛供吟笑  
滿座春風屬化成

隨遇悠悠皆自得莫論隆慶與襄平

和韓都憲秋夜雨有感

欵枕無眠夜氣深綿綿積雨異商霖空階滴瀝侵雙耳  
孤館蕭條攪寸心短燭此時惟對燭清聲何處忽聞砧  
離懷賴有詩能遣坐擁寒衾謾自吟

乙酉元日立春試筆時五十一

年華荏苒鬢如銀甲子今朝過五旬成化新正初改歲  
大鈞元日正回春九原先隴關心切千里鄉山入夢頻

只待河開便歸去江村耕釣老吾身

次金太守伯玉詩韻鄉舉後同赴京道中阻凍故

云

歲晚官河守凍時宦途能起昔年思多君久荷分符寵  
嗟我中遭失路悲故里相逢成老態交情閒敘展愁眉  
如今有子俱登第更羨賢郎早出奇

書懷

世情宜假不宜真齋白功名只剩貧垂老獨憐丹悃在

相知空歎白頭新青蠅積毀能銷骨驛牘分甘足養身  
長嘯碧山寧負我何如歸去作閒人

樂清軒詩為沙士清題

門枕清溪畫不如杜陵新卜浣花居蘭英繞砌清宜佩  
柿葉垂簷綠可書磬折奴顏羞媚世羽輕仙骨欲憑虛  
洛城多少行窩內爭候堯夫駐小車

穀擊蹄奔耳不聞一軒幽僻離塵氛吸殘竹葉杯中月  
夢斷梅花帳底雲古畫品高煩客定新題韻險向人分



年來久抱漁溪拙誰讀宗元乞巧文

日出城東未啓扃捲簾山色送遙青萍池水煖魚留子  
苔徑風暄鶴墮翎角里高歌垂釣檻子雲晏坐草玄亭  
只愁秋晚秦淮上太史應占有客星

不是詩仙是酒仙逍遙物外閱流年  
繁山移得雲根石鑿沼分來竹裏泉  
袖手厭談當世務閉門閒著養生篇  
支筇幾度尋幽徑疑入蓬萊小有天

竹床高卧靜無譁誰識城中隱者家  
棋局不收蒼蘚石

綸竿常占白鷗沙  
短籬帶露惟栽菊  
碧椀抄雲或飯麻  
安得青囊醫國手  
為君痼疾起烟霞

斂跡銷聲樂道真  
牀頭釀熟味偏醇  
還巢社燕如歸客  
窺榻寒蟾似故人  
落落乾坤雙短鬢  
悠悠泉石一閒身  
如今老我投簪紱  
結箇茅茨作近隣

平章風月信多能  
佳趣秋來分外增  
鵝鷺行中無夢到  
鳳凰臺上有詩登  
梅窓點易研溪露  
槩几耽書費剡藤  
已覺胸襟忘物我  
蕭然渾似了禪僧

抱膝長吟倚樹根，肯爲形役喪吾存。  
采芝客去方欹枕，看竹人來又叩門。  
春晚落花薰几席，夜深華月沁琴樽。  
人生出處多闕繫，何日相從與細論。

章方伯尚素家山十景之四

隄流園王

有園隄如帶上建游息亭

游息閒亭結搆低，縈迴流水漾玻璃。  
園橋有象清環壁，帶玉無瑕淨繞隄。  
五夜光芒粲星斗，三秋氣焰吐虹霓。  
渚蓮汀蓼供吟賞，雅稱幽懷取次題。

江旭浮金

江東通桃花渡西通舜江

桃花渡接舜江潮景態朝來未易描一片綵霞扶日上  
萬條金縷逐波搖龍門鯉化翻朱鬣蛟室人歸弄絳綃  
滿目晴光觀不盡乘槎思汎海天遙

月湖放棹

有賀知章故宅

幽居新構月湖傍湖上烟波正渺茫客棹每依鷗鷺渚  
漁舟常寄水雲鄉輞川應許王維老鏡水曾容賀監狂  
他日塵纓端可濯閒將一曲和滄浪

雪嶺歸樵

有白鶴山

薄暮深林雪後天  
野樵歸擔聳寒肩  
踏殘白鶴山頭雪  
斫盡青松嶺上烟  
短笛數聲離谷口  
長歌一曲到窓前  
清音入耳忘塵慮  
閒詠丁丁伐木篇

和胡大寧悼亡詩韵

瓶沉簪折事希奇  
造物年來頗見欺  
白髮幾莖添短鬢  
青燈一點照孤幃  
梨花夢斷春歸早  
桃葉歌殘月上遲  
昨夜有人彈別鶴  
隔牆粘弄不知誰

和高仲顯送弟敬宰吉水

出宰花封羨季方  
煩君遠送到江鄉  
青山影落朝移舫  
白雨聲喧晚對床  
滿耳絃歌聞魯邑  
一襟風月付奚囊  
歸來莫放秋容老  
有待登高把菊觴

挽刑部劉尚書

有序

南京刑部尚書劉公顯  
攷忽感奇疾兩疏於朝  
始得予告瀕行予往候  
問見其體羸神耗心竊  
憂之不意力疾登舟至  
嚴灘而沒感念疇昔為  
賦此詩以致哀挽之意

云

半世臺端著繡衣晚居司寇肅刑威  
匡時有術君恩重  
執法無私士論歸抱病乍回疏傳轍  
招魂忽傍子陵磯  
海邦畿甸存遺愛望絕蒼生雨淚揮

賀盧廷佐父母同壽

鶴髮雙親壽考同五花鸞詒拜恩封  
武公盛德歌淇澳  
僖母高年頌閔宮冠簇驪珠明翡翠  
袍呈鸞綵繡芙蓉  
光榮共享兒孫養千歲冰桃薦酒紅

謝嚴克勉送蛇酒

酒浸蚺蛇醉骨香，麴生風味信非常。  
捕難曾記宗元說，釀美應傳白墮方。  
萬里緘題來桂嶺，一尊分惠到茅堂。  
感君仁惠扶衰病，有意相攜入壽鄉。

和郁景章寄魏冢宰詩韻

世事於心了不關，杏花春雨墮紅斑。  
著書覓句情偏樂，賣藥修琴意自閑。  
林下白衣供酒至，山中黃耳寄書還。  
獨憐擾擾塵勞者，費盡機謀在世間。



次韻奉學士錢公原溥

昔陪勸講侍文華共秉丹衷輔國家只以讜言資啟沃  
肯將曲學騁浮誇幾年客路隨芳草今日庭磚踏舊花  
何幸南畿重聚首同年契誼自堪嘉

次韻奉亞卿章公大經

志務忠誠肯務華直言端不顧身家名高四海人爭仰  
望重羣僚世共誇節向疾風知勁草文從麗日見奇花  
愧予亦得陪清會細讀新詩字字嘉

次韻奉謝總戎成國朱公

手提虎旅鎮京華自是元勲世將家德澤深為黎庶感  
忠勤頻荷璽書誇爵分茅土傳千葉陣挾風雲演六花  
武畧文謨匡社稷明良會合際亨嘉

寄甥徐州衛蘇寬揮使

一別賢甥歲易徂每思把酒看昆吾十年道路秋雲滿  
千里音書旅鴈孤牙帳風清知校武柳營月白想投壺  
對牀夜聽蕭蕭雨有約重來覓二蘇

柯詹事孟時輓詩

平步金門上玉除  
龍頭妙選振芳譽  
瑤編每進青宮講  
彤管時紉石室書  
陸贄有才人共仰  
賈生無命席空虛  
舊寅大半傷凋謝  
目斷閩天淚滿裾

松坡竹塢二莊處士輓詩

白茅山下有雙墳  
云是莊家好弟昆  
已共昇棺還故里  
曾同賣藥在都門  
懷金客去寧求報  
種杏人存盡感恩  
喜見鳳麟為世瑞  
綿綿餘慶屬兒孫

黃楚祥院判母輓詩

有孫中舉

歌殘黃鵠撫遺孤  
王立兒孫盡璉瑚  
醫國術高龍授訣  
掇科名顯鳳棲梧  
堂前零落忘憂草  
林外哀鳴返哺烏  
苦節清風垂閭範  
百年無媿下從夫

贈韓都憲永熙致仕

指麾諸將耀天戈  
百粵蒼生屬撫摩  
藤峽渠魁皆勦絕  
蓬門士女盡謳歌  
膽摧素仰韓忠獻  
威震今聞馬伏波  
名遂功成歸故里  
碧山之樂奈公何

送周司寇廷玉獻績赴闕三首

弼教南臺正五刑，滿腔春意藹仁聲。  
紫苔翳雨封嘉石，綠柳凝烟繞貫城。  
已建于門容駟馬，還聞鄭履進孤卿。  
精神拜舞龍顏喜，寅亮天工屬老成。

秋臺司寇老尚書，滿績今看覲玉除。  
白鷺洲邊揚去舫，蒼龍闕下整朝裾。  
上卿雅稱三台列，元德偏宜八座居。  
喜有陰功傳燕翼，薇垣鰲禁接芳譽。

幾年憲部總刑章，此日朝天促去裝。  
只以寬仁輔堯舜，

肯為刻覈事申商九重入覲當清曉一葉驚秋送早涼  
昨對紫垣瞻北極泰階兩兩正騰光

送崔冢宰克讓赴闕

德尊望重有誰如來典南銓數載餘位冠六卿周冢宰  
官聯八座漢尚書寸心向日傾葵藿萬里朝天振佩琚  
喜動龍顏逢舊弼疇咨應見席頻虛

九月八日蔣宗誠請冶城登高分韻得將字

冶城佳節近重陽絕頂登高景倍常極目青山皆繞郭

放懷綠醕正盈觴塞鴻江上涵秋影籬菊尊前散晚香  
燕客喜逢詩社友一壺寧待白衣將

一碧軒為盛鉞題

北塘一水接清溪萬頃波光望眼迷星斗不分天上下  
烟濤常拍岸東西暖鋪翡翠平如掌冷浸芙蓉綠似萸  
愛此結廬成小隱沙鷗來往共幽棲

梅揮使冰玉軒

一軒瀟灑絕紛華四壁圖書趣自嘉清氣逼人冰欲泮

聖光滿座玉無瑕何殊天上神仙宅不比人間富貴家  
獨坐長吟詩思好篆烟閒爇度窓紗

歐齋為陳杰主事賦

歐公昔以齋名舫今日君將舫作齋翠岫入窓嵐氣潤  
綠楊當戶鳥聲諧烟波自覺閒情遣尊酒渾教俗慮排  
日上舵樓眠正穩野鷗沙鷺共忘懷

送盧大參廷佐赴官

喜遇清和四月天遠從郊外送行驪論心義重車難輓



惜別情深酒謾傳  
夾道黃雲翻麥壠  
幾村綠水沒秧田  
懽聲想沸東西浙  
應荷天恩廣布宣

倪文僖集卷九

欽定四庫全書

倪文僖集卷十

明 倪謙 撰

絕句五言

題花鳥畫

芳園散香風  
春色遽如許  
幽鳥寂無聲  
名花嬌欲語

題小景二首

碧水搖荻花  
金風剪桐葉  
山中有幽人  
坐待東林月

渺渺平湖水烟波接太空柳汀垂釣者坐裊一絲風

題畫

移家白雲深靜枕清溪曲日暮門不開茶烟颺蘿屋

題花卉翎毛

簇簇海棠枝雙雙白頭鳥何處聞一聲春風瑣窻曉

家慶堂為吳宗政賦四首

廣堂播光風踈簾散香霧中有孝親人承歡在階阼  
升階拜家慶載笑親心樂萊衣戲舞餘大斗時復酌

酌酒介期願絲竹亦駢列但願瓮中春消盡頭上雪  
雪消壽自延善積慶由天試看浮世上誰得似渠賢

題四景畫

水深不可厲欲濟川無梁不有榜舟子踟躕空斷腸  
青青不改色江水自清深寄語同舟客休生敵國心  
山中怡白雲危冠坐清秋亦有幽棲志朝簪未許投  
孤蓬載晴雪棹破寒江玉何處赴佳期林疎認茅屋

為江陰伍敎諭題葡萄三首

滿架延秋蔓虬鬚拂面長草龍珠帳底偏愛午陰涼  
秋冷驪龍卧高垂領下珠紫駝銀鑿裏遙想出天厨  
玉露承金掌漙漙下碧虛內園知此味應賜馬相如

風雨歸漁

江樹風力斜江波雨聲急孤篷有歸漁清寒壓蓑笠

水仙畫二首

嫩人有所思江皋靜無語翠袂含香風翩翩欲輕舉  
南國水中仙芳姿皎冰雪羅襪暗生塵盈盈步明月

把釣

幽人倚孤松垂釣滄浪波遊魚未吞餌水風吹綠蓑

朱買臣

樵夫荷雪檐太守懷金章世事多反覆貴賤安可常

魚

蘋藻綠依依鮮鱗躍處肥江湖宜適意切莫近漁磯

竹

懸崖見一枝露葉青可數宛轉逗回風翩翩翠鸞舞

梅

孤根春意動忽放八九花莫將稀疎看清香浩無涯

山水小景

蒼蒼雲外山磊磊礪中石古道無人過長橋浸寒碧

題蒲石

拳石浸清漪靈苗亦自奇虎鬚真可持相近莫相疑

劉主靜學士題墨梅見寄因次其韻以復四首

故人天上客遙寄一枝梅問是誰知已鰲頭舊大魁



一斥投邊喬寒肌瘦似梅下簾秋院裏猶想共掄魁  
咄咄坐終日何心復賦梅惟應學弓馬塞上縛渠魁  
蓬萊春日暖金鼎待鹽梅早踐台衡地調元酌斗魁

絕句七言

留別盧大海

同居泮水采香芹契合金蘭獨有君只恐一帆江浦上  
離襟愁對夕陽分

秋雨有懷盧大海

秋雨蕭騷思不禁  
小窻無寐擁寒衾  
只愁靜院空階裏  
滴碎相知鮑子心

聚禽圖

花容相映鳥相呼  
無限春光在畫圖  
可愛爭棲傍修竹  
不知誰是鳳凰鷗

題畫

誰向山中友鹿羣  
書聲清夜隔溪聞  
石田茆屋如堪借  
我欲來耕隴上雲

墨竹推篷圖

倚風爭舞翠雲翹  
半啟篷窻酒暈消  
薄暮欲投湘浦宿  
隔江誰弄紫鸞簫

題竹

露葉凝香翠欲流  
月華涼浸一庭秋  
恍疑阿母停鸞馭  
玉節玄旌散不收

小景為馮副使賦

春山春水足追遊  
滿目韶華興未休  
說與蒼頭多載酒

景逢佳處即停舟

寄趙永祥楊景通

退朝兩袖帶天香  
時復凝思入故鄉  
白屋近來曾到否  
素軒修竹長應長

次韻狀元梅

暗度寒香散碧虛  
百花頭上噴驪珠  
看圖却憶臚傳罷  
醉促前訶過紫衢

蓮塘水閣畫

曲曲闌干面面風危樓半墮水晶宮清香何處濃薰酒  
一色芙蓉十里紅

生子報內叔

畫樓日暖鵲聲乾俄見深閨已報安偏喜呱呱一笑  
朝回頻揭綉簾看

月梅

兔魄移從海上來玉龍水底誤疑猜夜深鱗甲驚飛動  
萬顆驪珠脫蚌胎

壽萱堂為陳用文賦

花前舞袖膝前歌酌酒看花笑語和但願憂忘春不老  
花開常近北堂多

怡親堂四時詩為臨川程潛麟賦

深深簾幙護香雲臉暈丹霞酒半醺試學兒啼供燕喜  
春風笑語隔花聞

白紵新裁換越羅仙郎能舞又能歌晚來侍寢頻揮扇  
但覺涼生枕簟多

堂上筵開晚未收  
霜柑初破洞庭秋  
婉容膝下承顏色  
不借萱花為解憂

冰下寒魚入饌鮮  
紅爐畫閣火頻然  
靈椿不改青青操  
自是春秋過八千

畫楫

紫毫喚醒老梅魂  
人在孤山月下村  
從此春風消不得  
玉容猶帶雪霜痕

西湖圖

湖上嵐光紫翠濃  
高低臺閣畫簷重  
鄉山滿眼不能到  
何日歸看九里松

題風烟雪月四梅

想見冰姿照素袍  
數聲橫笛漢江皋  
如今不逐春風落  
憑仗中山紫兔毫

一笑羣仙齒粲然  
霏霏玉骨鎖寒烟  
蹇驢踏雪曾相遇  
流水斷橋山店邊

東君私許冠羣芳  
萬斛明珠夜有光  
朔雪紛紛莫相妬



六花爭似五花香

孤芳宜託歲寒交  
尚白何須費解嘲  
五夜不禁清到骨  
半痕斜月掛晴梢

題竹

誰剪脩篁百尺梢  
獨餘翠篠半含苞  
不妨紫鳳飛來晚  
認得烟蓑有舊巢

一夜涼颼轉素商  
鳳毛月下影回翔  
玉枝瘦損知誰似  
却憶夷齊在首陽

題畫

散步林皋帶夕曛  
忘機飛下海鷗羣  
緣溪古樹半黃葉  
隔岸好山多白雲

題海棠蓮桂梅花四仙子

酒酣紅玉暈香腮  
幾樹紅葩一笑開  
滿地綵雲春夢裏  
只疑神女下陽臺

盈盈羅襪慣凌波  
低首無言斂翠蛾  
欲約水仙游洛浦  
臨風誰唱采蓮歌

雲鬟翠袖玉搔頭緩步行依桂子秋記得霓裳羽衣舞  
飛神曾向廣寒游

一別江南幾度春折梅誰寄隴頭人詩魂不作羅浮夢  
何事冰姿照眼新

小景畫

雨後來登水上亭殘紅柔綠滿前汀道人不是怜春色  
為愛芙蓉萬朶青

題夏仲昭墨竹

曾移綠玉到簷齊幾度詩成節下題  
偏愛小窓明月夜  
紫鸞飛落翠雲低

寄仁和聶司訓

縞帶隨車去莫攀詩名重見動江關  
畫舫醉倚芙蓉露  
吟到西湖第幾山

畫菰菜

秋末園蔬已著霜青青偏愛晚菰香  
沙鍋爛煮和根咬  
誰識淡中滋味長

雙鶴

綠樹寒泉雪羽明  
引吭時送九皋聲  
飄飄兩腋迎風舉  
我欲乘之上太清

題山水畫

溪上長橋對水扉  
野翁來往澹忘機  
白雲隔斷人間世  
塵土何緣得上衣

寄鄒廷璋

號南湖醉漁能畫嘗作謁陵圖未完

幾年書劍客京鄜  
掃盡溪山水共烟  
今日南湖應改色

翠蓬添隻醉漁舡

掉頭不顧拂塵衣  
駭鹿驚猿去似飛  
我在京華仍舊好  
每看殘墨思依依

枯荷脊令

秋冷池蓮葉半凋  
夕陽飛並影蕭蕭  
幽禽尚有相親意  
却嘆淮南尺布謠

題過廷章所藏錢惟心墨竹石

籜龍葉戰風泠泠  
滿耳秋聲生翠屏  
便好參差裁綠玉

九苞鳴鳳在虞廷

辛未八月初四日奉天門朝見口號

端笏晨趨玉陛間御爐香細繞龍顏  
嵩呼拜舞朝天罷寶殿東頭綴舊班

初七日選預經筵謝恩

經幃啟沃賴賢才何憶虛名及草萊  
仰荷聖恩天廣大願傾末學報涓埃

十六日文華殿進講易象禹謨

緋紫錚錚集殿庭君王負宸坐橫經儒臣講說通天聽  
聖學光明似日星

講罷賜宴

御宴宏開左順門玉壺瓊液滿金尊經年鄉國勞奔走  
今日新沾雨露恩

題葡萄二首

密葉風生夏日長草龍珠帳晚生涼主家留客琅玕簞  
何用冰壺出蔗漿



鱗甲紛披照眼低，鼎湖去後更誰騎？  
却疑劉累真能擾，天矯長髯到地垂。

草蟲二詠

蛻殼清高寄碧柯，寧知螳背已操戈？  
人生得意須回首，近日吳園露更多。

右螳螂捕蟬

清秋趯趯草蟲鳴，殘蝶猶翻粉拍輕。  
促織不知緣底事，微軀時起觸蠻爭。

右秋蟲殘蝶

牧牛圖

怪雨盲風撼柳梢便騎老牒返前郊任將破笠輕掀去  
莫捲江村屋上茆

弄鷁收豎倚陂陀閒縱芳村綠草多殘喘只今誰復問  
古槐陰處痒頻摩

題刻絲蓮花水草

渚花交映玉芙蓉綵縷粧成錦一叢自是天孫機上手  
當年刻楮未為工

題枯木竹石

天上曾乘泛斗槎歸來閒置海東涯  
波濤洗出金鰲背  
葉葉琅玕擁翠華

雨竹

九疑清夢隔烟螺  
湘水悠悠別思多  
滿眼翠華秋色晚  
倚風誰唱竹枝歌

題畫贈王都憲公度四首

有序

都憲顥菴王公奉勅總督京輸撫循畿甸直節英材著  
於中外還朝未幾使車復南嘗得小景一幅因析為四

詠題其端以識別聊以寓同年企慕之私耳詩云乎哉  
髯龍偃蹇負奇姿紫甲苔封屈鉄枝歷盡冰霜心不改  
後凋應向歲寒知

翠屏屹立聳嶽峯不受纖塵半點侵絕頂去天惟尺五  
蒼生深係仰韓心

暫解簪纓憇翠微公餘清適澹忘機此身雖在江湖遠  
魏闕心懸只尺威

銀汞遙飛石罅危望中一道玉虹垂九重天上多恩澤

常注汪汪萬頃陂

喜鵲

辭却星橋路已賒  
飛鳴猶占海門槎  
不知來報緣何喜  
昨夜銀缸也著花

傳說

審象旁求傳野賢  
商宗一夢格皇天  
為霖東取巖前板  
已築王基六百年

題夏仲昭墨竹

雲鎖秦樓鳳不歸  
憑誰重把玉簫吹  
太常游戲容臺上  
翠羽分明拂硯池

紅梅

仙子朝元下石壇  
却留丹竈付雲看  
玉蚪偷得三千顆  
瘦骨清癯耐歲寒

捕魚圖

雙飛紫燕掠春波  
綠渚芳洲次第過  
試問舡舡爭舉網  
不知誰箇得魚多

題奚官調馬圖

幼年在學中作

不是奚官不敢騎  
自緣龍骨世間希  
瓊林宴罷遊春陌  
應使人誇匹練飛

貢院撤棘黃學士以詩見遺步韻以復

命題當避歷科同  
細檢經書啟素櫬  
夜半錄成分次第  
魯論先得祭于公

考校新增八子同  
三千文卷集窓櫬  
五經搜閱分詩禮  
兼判春秋十二公

從知內外久扶同防範其如限一櫬得謗成讎俱不計  
已將盟誓付天公

共說前科志操同肯交關節透簾櫳飛章交構徒為爾  
美謚玉成文介公



倪文僖集卷十



欽定四庫全書

集部

倪文僖集卷十一

一至三

詳校官庶吉士臣陳若霖

中書臣劉源溥覆勘

總校官檢討臣何思鈞

校對官編修臣汪鏞

謄錄監生臣李崇賓

欽定四庫全書

倪文僖集卷十一

明 倪謙 撰

絕句七言

仲秋丁祭禮成分昨見及因成小詩二絕錄奉掌

教王先生

陪祀成均振佩珪年年鼎肉餽神餘誰知萬死投邊裔  
亦荷分臠到謫居

庶品頌來出豆籩親嘗深仰道如天此心若也含微玷  
舉筋能無媿聖賢

八月二十日夢與二美人共飲席上各請賦詩余  
得一絕醒而忘其首句因足成之漫紀於此

蟬鬢雲鬟逞麗妝鬱金香噴紫羅囊平生未識紅鸞字  
願借春纖寫數行

于景瞻以閨情和予夢中之作少寓熱中之意因  
效顰以復十首

幾回搦管不成章  
空把鹽枝揀路傍  
封臂絳紗何日解  
菱花一夜恐飛霜

又逐殘雲過女牆  
曾陪歌舞在昭陽  
如今羞見纏頭錦  
空惜餘音繞畫梁

湖山石畔好燒香  
銀漢無波玉露涼  
低蹙翠裙深下拜  
細將心事訴穹蒼

落月流輝照屋梁  
又看紅日上扶桑  
若為化作山頭石  
望見夫君志亦償

千金不惜買文章永巷秋深灝氣涼  
若得重瞳親一顧含羞誰引駕車羊

又逐鳴鳩到耳傍青春背我去堂堂  
谷風自昔歌葑菲涇渭相形益可傷

偏訝愁隨一線長肯同桃李競新妝  
此心非石安能轉自保堅貞比衛姜

一刻千金孰與償瑤琴無復鳳求凰  
妾心有似池中藕雖斷柔絲綰更長

已甘抱節比枯筲曾薦青奴一夜涼就使秋風能再熱  
敢辭辛苦侍幃房

只愁金剪割離腸恩寵難憑苦不常已媿短檠牆角棄  
何時遊鱗海東洋

青山白雲圖

蒼蒼萬壑暝雲浮誰伴深林鹿豕遊眼底鄉山故無恙  
一帆孤負五湖舟

鷺絲畫

白雪氎氎好羽衣  
藕花洲渚恣鳴飛  
自緣肌骨生來瘦  
豈是魚蝦不療飢

次韻董廷器閨情有序

昔周之國風為孔子所刪定  
其間男女夫婦之詩殆居  
其半  
蓋男女者三綱之首  
萬事之先  
人情之所不能無  
者  
後之君子或去國之遠  
或不得於君  
則多託之以寓  
興望夫壻之  
不來  
冀君王之眷顧  
悵年貌之衰謝  
欲才  
用之及時也  
讀者弗察類以房闈狎昵之私視之  
豈足

以知詩人之旨也耶若碧溪董先生所示閨情之什盖有以近之矣率爾和去辭媿弗工覽者能以此意求之則思過半矣

柳絮飛時雪作團亂人心緒正漫漫侍兒呼取添衾褥道是輕盈不禦寒

默倚雕闌數鴈行雙眉蹙破遠山蒼不如後院閒消遣去送秋千喚女郎

遠道回車未肯膏為圖名利逐兒曹歸期望斷門空掩



坐對梨花月影高

片片飛花逐水流  
園林綠暗不勝愁  
斷腸無計留春住  
人老東風燕子樓

鳳幃拋却綺羅香  
一別天涯有底忙  
幾陣黃梅窓外雨  
飄瀟潤浥藕絲裳

白汗凝珠拭素巾  
壠頭麥熟又嘗新  
鎖窓倦繡停針線  
蛺蝶飛來最惱人

柳岸涼風透葛蕉  
心旌愁絕正搖搖  
蘭舟去後知何處

新水空添沒斷橋

破愁曾借步兵厨一枕渾忘醉夢餘鸚鵡無端却饒舌  
鬢雲低挽獨躊躇

遠寄寒衣手自縫泠泠涼雨滴疎桐孤燈相伴坐來久  
不覺忽聞山寺鐘

高柳清秋咽露螢聲聲應是怨淒涼妾懷敢向何人訴  
只禱虛空爇夜香

散步苔階晚飯餘月華如畫列星疎碧天多少南征鴈

若个能傳萬里書

昔賞黃花到夕陽奉君懽飲罄壺觴如今九日人何在  
縱有香醪不忍嘗

壁燈炯炯夜籠紗霜氣生寒墮素華坐擁繡衾清不寐  
數殘更點思無涯

愁緒無期每自來翠蛾雙鎖遣難開夫君不學衡陽鴈  
一去如何忘却回

香滿金猊火滿籠燈花報喜結芳叢阿鬟向我忻相賀

明日歸期却又空

鴛鴦戢翼兩心安此願何時得了還空慕青青松與竹  
歲寒不改舊容顏

題小景畫

白雲紅葉已驚秋  
蘿屋涼生境倍幽  
長嘯碧山寧負我  
不勝清興繞滄洲

題鷺絲畫為麗地官賦

羽儀偶別鳳池行  
暫落蘆花野岸傍  
回首凌風忽飛去

碧天空闊海茫茫

潔白清脩立釣灘雲程遙待逐鵬搏漁翁不識孤高性

漫作沙鷗一樣看

自仲秋丁祭而下皆寓宣時作

二月初四日夜夢中作

庭前昨夜起秋風落葉蕭蕭萬木空獨有此君顏不改  
依然無恙月明中

題王孟端碧梧竹石

朝回曾據鰲峰石薤葉淋漓草制多一別掖垣成白首

鳳凰樓老碧梧桐

題畫寄楊尚書宗器

一卧林泉絕世埃柴門深傍碧山開故人遙在青雲上  
常夜頻勞入夢來

墨梅和苗學士韻王牧之筆為謝景明題

姑射仙人去不還臨風玉雪想容顏王喬袖有長生術  
喚醒冰魂楮墨間

海月初高瘦影斜凌寒璀璨吐冰花一枝懸向高堂上

玉樹從來屬謝家

題米南宮雲山圖

雨聲入樹密如烟雲氣埋山白似綿  
釣罷歸來掩關卧不知春水到門前

金蘭畫為王司成題

幽獨元無富貴心誰將花葉染黃金  
援琴試鼓宣尼操惟有靈均最賞音

題懸崖墨梅

深冬崖畔一枝懸幾點踈花鬪雪妍  
五夜影橫清澗底抱珠疑是老龍眠

畫龍

天矯擎雲出海深九霄常抱濟時心  
何當捲却滄溟水去作人間六月霖

畫虎

雄視耽耽夾鏡明空山日落恣橫行  
壁間只作尋常看一嘯風生百獸驚



題漁舟小景

山色浮嵐水拍空  
釣舡閒繫綠楊中  
飯鐺旋爇蘆柴火  
一股炊烟散晚風

觀蓮小景

高閣涼生五月秋  
芙蕖萬柄出清流  
披襟獨倚闌干坐  
為問先生可姓周

易洞為丁無咎賦

羲皇卦畫本天然  
首贊何勞擬太玄  
獨抱遺經深洞裏

不知幾度絕韋編

為郁景章題竹和張廷端韻

從教桃杏逞春酣獨立江皋分所甘誰把紫簫驚宿鳳  
凌風毛羽綠繆繆

題赤壁圖為太守金伯玉

赤壁江空水接天舉匏揮翰憶坡仙如今只有東山月  
曾照當年載酒舫

題懸崖竹

晚移孤棹過湘川  
翡翠晴搖兩岸烟  
吟倚斷崖清不寐  
一枝涼影月中懸

又題竹石

昔年視草上鰲峰  
日照琅玕翠影重  
一別鳳池今十載  
枝枝猶帶露華濃

題竹二首

扶疎林外幾枝存  
猶有清陰落酒尊  
莫惜烟梢半摧折  
春風爭看長龍孫

蕭森綠玉楚江潯積翠凝烟自滿林  
試看歲寒冰雪裏  
青青方見一生心

詩餘

臨江仙題觀泉圖

檜壑泉垂朝雨後冰簾一片誰收  
兩髯閑坐古磯頭  
回頭頻指點飛雪灑清秋  
白羽停揮涼意透  
冷光晴射雙眸  
夕陽不盡古今愁  
伯牙絃上趣曾遇  
賞音不

菩薩蠻題小景畫

短篷載雨隨流下  
木蘭畫槳無人把  
兩岸碧波平羣山  
似馬行浮沉飄一葉  
遠水長天接歌枕  
愜吟情有詩成  
未成

滿江紅題把酒問月

靈籟無誼良夜永  
冰輪初上秋如許  
金風薦爽素波清  
漾白玉臺高天咫尺  
褰裳覽眺吟懷暢  
便浩歌把酒問  
嫦娥遙相向如漢水  
葡萄釀似鯨吸江湖  
量乾坤兩白眼任渠  
豪放想是長庚來采  
石金鑾乍別青藜杖  
待更

闌抱阮好歸休林雞唱

明月棹孤舟題月下撫琴圖

露下天壇秋月皎閒來此豁舒襟抱細拂冰絃閑調玉  
軫彈曲廣陵仙操思入冥冥塵慮掃繞十指鶴鳴鸞嘯  
流水高山子期何在不見賞音人到

好事近題踏雪圖

江路曉風清滿地亂堆瓊屑謾策蹇驢閒步採梅梢香  
雪小橋流水不知寒春意已潛泄望隔岸何處有珠宮

瑤闕

漢宮春題半身停簫仕女

金縷裁衣更腰繫霓裳內家粧束蛾眉淡掃高綰烟鬟  
凝綠隔窗遙見倚東風海棠春足還堪恨被遮羅襪凌  
波步蓮雙感一枝楚江寒玉露纖纖十指春蕪輕拘秦  
樓何處悵望鳳鸞追逐何當拂瑄啟朱唇暗留芳馥想  
只待賞音佳伴為吹箇洞天仙曲

次韻鵲橋仙賀費彥昇壽六十

莊椿甲子費壺日月厯象也難推候瑤池阿母向西來  
特地把蟠桃薦酒竹梧標格鶴鸞風采但見年年依舊  
稱觴莫道我來遲喜和得陽春添壽

踏莎行題扇

湘竹披烟剡藤裁雪斂舒蹙就棕櫚摺動搖一握展開  
時半彎恍訝瑤空月赤日低焚火雲高結人間何處逃  
炎熱便將入手不停揮涼風滿面真清絕

浣溪沙題夏景



紫燕營巢語畫梁  
海榴噴火散清香  
困人天氣日偏長  
夾道槐陰張翠幄  
滿池蓮艷鬪紅粧  
薰風殿閣送微涼  
喜遷鶯詞贈南京太常少卿莆田陳公赴戶部侍郎之召時李立之少卿尚留南寺

帝城清曉見彩鳳  
銜來九重丹詔寵  
溢弓旌先生輪帛  
云有聖恩宣召偉  
器惜居閒散雅望  
合登樞要典三禮  
有一夔自足何須  
雙妙爭道舊曾向  
粉署蜚英久矣推  
清操政貳民曹班  
聯常伯看展經邦  
才調趣駕曹參作

別前席賈生初到敷奏處聽薰絃阜物世躋熙皞

小重山題斑竹白扇

十二江妃白練裳微風吹不散  
郊藤香斑斑清淚灑英  
皇離魂斷金珮冷瀟湘暑氣正探湯  
堪憐一握入手相  
將翩翩鳳羽近人翔全憑仗付與透襟涼

畫錦堂送都憲高公致仕

黃甲高登烏臺峻擢其奈親老誰將幾載白雲入望攪  
亂柔腸一杯菽水懷桑梓兩封章奏達巖廊吾皇道爭

似此人忠孝暫許還鄉懽聲心事遂便却却朝簪整頓  
歸航一水家山咫尺況遇秋涼都門出祖離觴灑畫堂  
獻壽舞衣長茲歸也好看椿萱並茂喬梓同芳

沁園春送程司馬還新安

能武能文祿位功名始終保全想身依鳳闕親承恩露  
手提虎旅汎掃蠻烟鎮守南都命參機務司馬兼收將  
相權也只為把險艱厯徧足疾纏綿一封疏乞歸田俄  
優詔遙飛下九天許暫返柴桑優游泉石勉親藥物頤

養天年當寧思賢人惟求舊早晚徵書來日邊從今去  
遇家山風景且莫留連

倪文僖集卷十一

欽定四庫全書

倪文僖集卷十二

明 倪謙 撰

頌

聖德格天頌

臣聞皇天無親惟德是輔德者格天之本也迺者正統四年自春徂夏亢陽作慝靈雨不降溝澮乾涸來牟萎瘁蒔揷有後時之憂西成失有秋之望皇上惻然憫之

曰天有數之適然在人宜盡理之當然迺祇承勅厲反躬自咎減膳徹樂省寃恤孤下寬大之詔傳不急之務兢兢業業罔間晨夕遂致聖德潛孚達於冥漠天心降監霖雨應祈以和召和捷於影響天人感應之機何若是其速矣乎昔成湯旱暵七載宣王饑饉荐臻桑林自責雲漢興憂久而方解孰若我皇有感即應較之商周實為過之臣才謏薄不足以美盛德告成功恭沐休澤曷容以默謹拜手稽首而獻頌頌曰於惟聖君父乾母

坤昭事上帝子育黎元謂天蓋高視聽伊邇至公無私  
惟德是與數有適然或愆其期人事既修天即應之顧  
茲春正逮於夏月亢陽作慝川澤以竭溝塍龜坼來牟  
瘁枯蘊隆蟲蟲嗟我農夫時揅後時茂茲萇稗倉箱既  
空室家奚賴皇曰於乎斯人何辜耗斁下土寧丁我軀  
迺益虔恭兢兢業業鼎珍不舉宮縣以徹既省滯寃復  
卹惻孤衆務斯復民力用甦懷柔百神惕厲祇若仁慈  
潛孚達於冲漠帝謂聖君子懷明德監視四方宜沛爾



澤迺叱天公迺驅豐隆阿香推車翼二起風虐魃誅殛  
商羊鼓舞月離于畢甘霖斯溥土壤優渥禾苗勃然仆  
者以起萎者以鮮三農懽忻康年可必全吾所天伊誰  
之力迺知彼昊明德維馨以和召和若響隨聲昔有成  
湯暎乾七祀禱於桑林責以六事亦有周宣赫赫炎炎  
雲漢見憂八章屢言睹茲持久天心始回惟我聖君有  
感立隨於惟聖君德與天俱超軼商周比隆唐虞於惟聖  
君德與天一蕩蕩難名巍巍莫述成功盛德用告神明臣

拜稽首謹揚頌聲以似以續歲書大有臣拜稽首天子萬壽  
表箋

請建皇儲表

南京禮部

伏覩成化十一年六月十八日欽降禮部勅書朕皇子  
年已六歲尚未有名恁與翰林院會議定擬來聞如勅  
奉行欽此臣等聞之不勝踴躍懽慶以為國家離明有  
繼主器有託誠宗社萬年無窮之福也臣等竊以貽謀  
燕翼周武所以詠豐芑預定太子漢文所以尊宗廟自

古聖帝明王君臨天下未有不以蚤建儲副以為宗廟社稷萬世之計者也肆惟皇上嗣膺大寶十有二年矣向嘗建立儲闈不幸早薨今東宮久虛前星啟耀中外臣民遑遑仰望已非一日一旦恭聞勅旨知華渚之虹流喜斗樞之電繞孰不以為皇上必遙降德音即定大本以之正位於少陽而尊居於鶴禁也哉然涉月經時不聞明詔臣等心如焚灼踖躅靡寧乃敢詢謀僉同合辭上請伏願皇上念承祧之重塞窺覲之端俯徇輿情

特賜明斷立皇子為皇太子以定人心以隆邦本綿社稷久長之慶紹祖宗統緒之傳庶以愜中外羣臣之心慰四海萬民之望宗社幸甚天下幸甚臣等言狂計愚實出忠愛干冒天威不勝悚懼待罪之至

冊立皇太子賀表

某官某等伏觀成化十一年十一月初八日冊立皇太子詔諭天下謹奉表稱賀者臣某等誠懼誠忤稽首頓首上言伏以震器承祧衍本支於萬世離明繼照溥恩

澤於八方正一人之元良罄兆民之懽戴恭惟皇帝陛下聖由天縱德與日新承祖宗積累之洪休撫國家靈長之景運是以祥開宮壺篤生龍鳳之姿慶錫穹蒼允協麟騶之應遂定天下之大本懋隆宗社之昌圖臣某等職守南京忻逢盛事仰前星之瑞世祝聖壽以齊天

賀皇太后表

伏以長樂慈闈至養孝隆於聖主重熙景運厚澤慶衍於神孫恩被臣民懽騰海宇恭惟皇太后陛下寬仁雍

肅柔順溫恭贊先帝之勤勞母儀四海翊嗣君之德理  
子惠羣生遂宏宗社之遠猷聿定儲副之大本承祧有  
託垂裕無窮五百歲而聖人生適符其數億萬年而邦  
本固實啟其祥臣某等職守南京忻逢盛事睹前星之  
拱極德協重華仰坤元之配天功齊厚載

賀皇太子箋

伏以明兩作離光繼四方之照洊雷居震器承萬世之  
安慶洽邦家懽騰遠邇敬惟皇太子殿下聰明天授濬

哲生知龍鳳之姿卓冠乎羣倫天日之表首出乎庶物  
性全孝友而仁愛心具恭敬而中和是宜欽膺冊命而  
正位春宮也臣某等職守南京忻逢盛事仰前星而敬  
拜祝壽筭以千秋

贊

處士程用中贊

蚤罹繹騷避難奔走長際聖明喪厥父母墓封崇以若  
堂面哀毀其如黜祖構克承而孝行聿彰聞絃弗續而

恩義彌厚知樂顏堂生也何憂丘首得正死也何負嗚呼此其所以為忠壯之孫伯符之後者耶

周亞卿畫像贊

堪輿鍾秀篤生偉人文名應乎列宿德譽冠乎朝紳爰竭丹悃受知紫宸允愜乎中外之望付託以東南之民無隱不燭有言必陳邦計資以充羨黎庶樂以拊循容之舒也溫其如玉澤之溥也盎然如春身厯事乎四朝行不染乎一塵誠所謂國之柱石帝之股肱民之父母



世之鳳麟者也

嘉慶堂贊

并序

昔宋吏部尚書夢得葉公高宗朝以節度使致仕歸老  
雪溪其後子孫散居包卞二山之下殆今千數百家若  
惟讓者是已惟讓之先有堂曰嘉慶元季厄於兵燹惟  
讓即舊址募工伐材而構之屹復故規惟讓尋遷寓京  
師遂與堂別而此心未嘗忘之也乃徵學士大夫珠玉  
紀咏乎斯堂以其子順天庠生寬嘗從予游欲贅一言

予閱其所修世譜而知葉氏嘉慶其來尚矣尚書之後  
有暘谷者隱居行義不慕榮進闢田治生家以豐裕嗜  
賙卹窮匱人目為長者生均茂克肖其志當元政失御  
歲歉人飢慨然曰吾豈可忍視一鄉之瘠而俾一室獨  
肥乎即發廩濟之大疫殍死盈道又為斲樁掩埋之生  
伯森荐經亂離克守世業不墜生子謙獲際聖明海寓  
清寧益修植德善務於繼承子謙所生則惟讓也慷慨  
有大志嘗曰吾家世以詩書之澤相傳豈可自我而廢

乃涉獵經史恢拓前人舊產積遺書修譜牒有子五人皆教以義方碩德令聞蔚為包山之望斯堂之構特其光前垂後之一端也觀其嘉慶之實若此其名不亦宜乎予嘉斯堂存而復亨也謹拜手為之贊曰

有翼其堂包山之陽制實輪奐名亦允臧厥名伊何是曰嘉慶奕世相承彌遠彌盛嘉之為義衆美所儲慶之為義積善之餘矣求慶源肇自遠祖老成典刑為宗室輔遂有暘谷均茂繼之既葬人死復濟人饑是慶之嘉

其澤日侈孰衍其流伯森父子逮惟讓公克孝且賢肯  
堂肯構有光於前豈惟光前垂裕爾後尚培其基以峙  
不朽公侯復始跂予望之有如不信視此贊辭

楊貢知縣待漏像贊

外之晬也冰清玉澤內之克也海匯山積自黃甲以策  
名致金閨之通籍奮鵬程於九萬近龍顏於咫尺道在  
經綸志覃忠赤端笏裁冠垂紳正舄接曉班於鵷序向  
巖廊而鵠立此其九門未闕而待漏於左掖者也

貓互乳圖贊 并序

太僕少卿錢唐王公家畜二貓一狀類獅子一斑類玳瑁各產四子銜置一棲互乳不擇蓋和氣之應也公嘗繪為圖其子中書廷瑞出以示予予覽而異之遂為之贊贊曰大鈞播物元氣渾淪惟人克全物乃駁昏嗟嗟二貓形質有異生子互乳不相猜忌捕噬鼠輩貓性所知胡於他產一視同慈匪貓之慈盛德之應以和召和表茲家慶家孰無貓孰若我鄉父父子子藹乎中庭信

及豚魚昌黎所紀千載北平允儼殿美伯奇履霜閔損  
御蘆人反不然盍視此圖

尚寶宋君士皋像贊

猗與宋君衣冠偉如梧竹其標金玉其軀氣清神融陽  
燧方諸美質令望圭璋瑾瑜學問富蓄山藏海儲文辭  
豐縟雲斂霧舒發身名科春榜鄉書列職近侍紫垣玉  
除肆夏以行采齊以趨禮以為衛敬以為輿孫志守謙  
輝光不踰方物發謀應務有餘圖書滿家以味道腴琴

瑟在側塵慮以祛正而不阿通而不迂彼美若人君子  
之儒二惠競爽鳳鷄龍駒接武瑞世其在此歟

兵部尚書徐貞襄公像贊

容莊而肅氣溫而穆惟德章只鳳羽之文麟趾之仁為  
世祥只用過蠻方曰來享王振乾綱只守備南畿叅贊  
戎機勤靡遑只位長夏卿作帝股肱弼元良只錫予便  
蕃宸章屢頒被寵光只境宇寧謐功存社稷紀太常只  
清白一節孰可磨涅允貞襄只仰瞻遺像為國悽愴我

涕滂只積之孔厚保艾爾後衍餘慶只

鹿千戶鏞行樂像贊

系宗五鹿職典千兵德容外睟才略中翬彼交匪教其  
儀不忒兔置好仇羔羊自得

李靖菴像贊

又號大虛散人

癯然山澤之儒而味乎道真泊然聲利之途而超乎世  
塵心存希夷抱先天而獨玩神遊溟滓與太古而為隣  
吟發浩浩之趣醉懷拍拍之春是蓋將戲弄日月於費



壺凌歷甲子於莊椿者也噫此其為太虛山中之散人也耶

徐醫士季東先生像贊

長身而美髯氣充而神全少適情於湖海晚遯跡於林泉非禮弗為而寡合者人以道自樂而所契者天心惟尚千古之交手不釋百家之編傳世學於青囊精藥性於楮鞭治病能生死而骨肉察理則造微而入玄斯人也雖其聊試工巧而為當代之名醫實則不求聞達而

為在野之遺賢百世之下高風邈然

訥菴陳士謙像贊

良玉在璞盛德若愚遨遊湖海浮湛里閭洗箕穎之耳  
讀洙泗之書松雪書法馬夏繪事筆之所工金石遺文  
鼎彝古器家之所儲放懷少陵之詩高隱子雲之居抗  
志物表遊心太初茲非在野嘉遯之賢斯文博雅之儒  
也耶

李太常立之父像贊

坦乎性情肅乎儀形著德容也岷山崢嶸江水淵泓秀  
所鍾也存心有恒待人以誠持敬恭也周卹孤惻舟捐  
橐傾義是從也遺子金籛何如一經致登庸也宸翰褒  
稱命服光榮貤恩封也貴而不矜名重鄉評仰高蹤也  
子孫衣纓奕世其承何天之龍也

鄒宗伯宗盛待漏像贊

德懋學邃神清氣豪早擅文於甲第遂司武於兵曹其  
律已也著冰檠之聲譽其修職也致夙夜之勤勞是以

克篤忠藎荷寵褒方圻父九伐之法是典遽伯夷三  
禮之柄是操職踐容臺之長位居宗伯之高幘頭草帶  
象笏緋袍獻納待九門之漏明良慶千載之遭斯人也  
觀其累朝委重奕世濟美豈非國之麟角家之鳳毛也  
耶

約菴柴永春像贊

挺梧竹之高標適江湖之清意雖泰不驕以義為利視  
人無間於物有濟樂悠悠之性天存坦坦之心地噫斯

其為約菴之風致也耶

李太常宗周陪祭像贊

得繕性葆真之旨負稽古考文之學宗黃老之玄虛典  
夷夔之禮樂心之靜也千頃之陂神之清也九臯之鶴  
早踐容臺之尊繼荷清卿之擢馭歷兩京以肅雍而相  
祀事厯事五朝以寅清而承寵渥觀其齊明盛服有孚  
顙若其詩所謂溫恭朝夕執事有恪者歟

友竹張志確像贊

謂為窮也則與翰林諸老酬唱於較藝之宮謂為達也則與考槃碩人寤寐於山礪之中蓋其身雖隱而道則顯外雖約而內則豐學之博也著於賦詠擅高岑之妙才之良也形於翰墨奪鍾王之工德之孚也則授徒而戶屨滿孝之篤也則養親而甘旨充所友者青青數竿之竹所託者冥冥萬里之鴻觀其結社吟壇詩琴壺奕悠然胸次之灑落作賓鄉校衣巾杖屨肅乎禮度之雍容此其人其真得曾點舞雩詠歸之樂而不改顏淵簞

食瓢飲之風也耶

封兵部主事愛竹盧公像贊

此愛竹翁之像也靈臺丹府廓然太古之天修髯美姿  
灑若物外之仙其立志則耿介而不苟其操行則正大  
而不偏處事惟仁義是尚交友務始終克全是以教子  
為國家之用致身荷錫命之專備箕疇之盛福享莊椿  
之永年觀其赴郊遊詞客之會居鄉飲上賓之筵望而  
慕之者孰不以為香山之老洛社之賢也耶

羅都憲公服像贊

鐵面霜威足以懾姦回緋袍象笏足以肅敬仰早結當  
宁之知荐擢外臺之長激濁揚清伸冤理枉橫鵬鶚於  
秋空擊豺狼於草莽是以郡邑賴其澄清而朝廷優其  
爵賞斯人也其高明之識剛大之氣盖得孔門賜也之  
達孟氏之養者歟

畫士汪孟文小像贊

其為氣也矍然而清其為人也慤然而誠蚤遊心於畫



苑遂馳譽於墨卿天機超越意匠經營此所以筆端造化咫尺有萬里之勢胸中丘壑磊落成一代之名也歟

學士錢先生像贊

性姿清粹風神秀朗文能華國馳翰苑之名學足致君進經筵之講籍籍書香之傳楚楚鳳毛之長撫夷却金著使節於南交牧民遺愛建生祠於東廣天挺三吳之豪人歆一代之仰茲非所謂有大設施者由其有大涵養者歟

箴銘

存養軒銘為周文彬作

烝黎克生曰彼天厥形惟肖理賦焉心為神明性體全  
純粹至善豈有偏仰惟亞聖覺乃先懼斯戕賊操靡堅  
昭晰大訓垂七篇存之母似雞犬然養之勿若杯與棬  
修身以俟惑罔牽天命我立聖可肩惟周力學務一虔  
不舍不害志愈專服膺弗失匪外遷俯仰無忤希先賢

守謚齋銘為馬駘作

天道虧盈曰謙是益惟人時憲宜守勿失牧已以卑承物以虛尊而有光卑不可踰處高斯危履滿斯潛慮以下人邦家必達相在茲字持之靡忘無往不利終焉允臧

寧靜齋箴

周尚文甫以寧靜為室慾之方而徵題於予予慮其未知要之所在也故為遺之箴曰

心處於中也甚微而欲攻於外也甚衆譬彼冠攘俟隙

而動使局鑄之靡固將轆轤以畢乘禦匪有道曷云能  
勝所貴君子惟寧惟靜豈槁木魚死灰若止水與懸鏡  
洞然其明浩乎其虛雖紛接之不足吾隨應而有餘物  
莫能遷事莫能亂理欲之幾於焉以判嗟嗟寧靜曰敬  
是持厥要為主始克勝私古我聖賢從事於此墨卿司  
訓用勵厥始

存素軒銘為鍾廷玉著

人之一心皎然虛白是為太素純粹靡忒外物交誘其

中乃移一為欲染本源竟縑汨汨而生質質而死禽耶  
獸耶相去無幾庶民則去惟君子存持循固守仁義是  
遵務克已私用反天理刮垢滌汙日新不已如彼日月  
出雲以升始非加損今非有增惟一惟靜存存弗失揭  
銘座隅式警晨夕

壽山石銘

有序

尚寶司卿憲君伯榮太師忠定公長子也君初度日其  
子時澤時潤嘗獲奇石以獻背文隱起曰壽誠壽徵也

君因命曰壽山余為銘曰

山之壽文隱籀翠峰巔屹聳奇秀堪輿闡秘介耆耆俾  
彌爾性永同久山之壽後天朽

坦齋箴為吳敏宗政著

道若大路人莫不由矢直砥平曾何阻修行之以仁蹈  
之以義踐之以信運之以智八荒洞達無往不然斯善  
履坦以全其天昧者弗循妄存官府出門有礙自貽伊  
阻枉者弗遵私立畛域乃驚他岐為問茅塞人欲滋熾

冒險履危心勞日拙其存幾希乾坤之德曰惟簡易自  
昔先民心同天地彼君子兮坦然此心永保貞吉而戒  
是欽

馬升雲達字箴

維人有身長與稚異首服既加幼志斯棄字言孳也名  
義所生大賓攸命爰責其成錦衣馬公桓桓貔虎秉國  
憲網兼資文武篤生震器秀眉玉膚麒麟之乘鳳鸞之  
雛升也其名雲達其字木生地中易象之義君子觀象

厥德是修至於高大積累之由乃躋顯榮如木之發接  
武青雲亨衢九達迺贊宸畫茂策華勛勒銘鼎彝圖像  
麒麟是為亢宗亦曰善繼襲組傳珪子孫弗替崇階峻  
級不已其升詢名考義拳拳服膺

冠而字所以責成人之禮也錦衣指揮同知馬公有子  
曰升聰敏好學材器雋偉冠而字以雲達蓋取義於易  
象也鉅卿宗儒從而發揮之已無餘蘊尚容置喙其間  
哉然雲達嘗納交於予則是朋友有箴規之義也故本



易象言之

尚士廉字箴

有序

孟子曰可以取可以無取取傷廉廉者士君子守身之節操也然非心清而欲寡則見義不明處事不審其於所取烏能保其不傷廉哉蓋禮義廉耻國之四維廉耻立則士習美而民俗厚國之綱維於焉以張而天下治矣故士莫貴於廉士之不廉猶女之不貞繼有他善奚足尚哉金臺尚君名清賓為製字曰士廉嘗與予同舟

南下朝夕促膝而談欲予演繹其字之義而體諸身也  
予聞古有訓廉之箴因推是義乃為箴以勗之箴曰

先民有言貨悖而入者亦悖而出君子臨財勿事苟得  
廉於所取由心之清心苟昧理溪壑豈盈故分所當得  
雖舜受堯之天下不以為泰使或非義則不取諸人以  
一介富春七里灘洛陽三尺雪視利祿如敝屣凜千古  
之高節胡椒八百石錦障五十里徒斂怨而召禍菑害  
逮於一已咨爾士廉貴審厥從蟬蛻汙濁蘭雪清風為

鑒孔昭勗哉夫子敢布訓辭用告侍史

白石硯銘

良玉生烟中含太玄是為吾田以筆耕其間用資吾之  
所欲言

木枕銘

木之質堅如石中凹自成匪雕飾以藉吾首薦寢席賴  
爾安眠體舒適

倪文僖集卷十二